

卷三十二
列傳下二

同州府志

同州府志卷三十二

列傳下二

王又旦字幼華號黃湄邵陽人自少力學砥名節言動必
樸古人爲制舉藝高簡深醇蹈時畦以逢世弗屑也順治
丁酉魁於鄉戊戌成進士康熙七年授湖廣潛江知縣其
地素稱繁庶歷兵燹水潦之餘城郭蕩圯轉徙者相望於
道田畝不均賦日逋民日困公歎曰政民之庇也害不去
則利不可興於是區畫疆里稽戶籍察流亡核詭匿以鄉
規田以田均畝以畝定賦姦弊無所容而流亡窮困者皆

落其籍一時如解倒懸久之困者蘇流者歸民始有寧宇
焉潛江處漢水下流故有長隄捍水往往潰決橫溢漂沈
墓舍田禾無算公親畚鍤督衆築之轟若雲岑漢乃不爲
患又建傳經書院以課士築說詩臺操纓軒以時講習於
是百廢俱舉縣大治十四年行取給諫外艱歸二十年授
吏科給事中初漢水多決屯營灣屯營爲荊州保障決則
直冲郡治而害及於鍾祥荆門景陵京山潛江諸邑故隄
捍諸邑合修事權不一官吏因以高下弊叢生旋築旋潰
成勞盡棄公乃首陳其弊請令各堅所轄罷協濟以杜諉

卸而專考成從之由是湖北免漢水之患二十三年擢戶
科都給事中典試廣東花山者界接番禺清遠從化三縣
崇山密箐鳥道深阻中通四省賊窟盤占十八峒諸險時
時出沒剽劫爲患滋蔓將不可圖公復

命白其事請建縣治設官吏奪蠻荒險遠之恃使姦宄有
所彈壓而不敢爲亂

上允其請粵人賴之凡所建白莫不有關國家利弊

上甚重之未幾以疾卒朝論惜焉公性純厚孝友稱於鄉
廉能著於官正直重於朝與人交一言之出終身可復尤

善獎拔士類端靖惇裕不爲畦町博學能文尤工於詩出語必期可傳不苟作以延時譽故海內言詩者必新城邵陽新城者阮亭也公有黃湄集十卷行於世祀鄉賢祠墓在百良村南子鳩字用拙號莘農太學生鄉飲大賓著有松栢後詞一卷

邵陽志

范維霖字用生邵陽人參政燧之元孫也父如淹諸生贈徽州知府惟霖以孝友爲宗族稱易直醇厚人人以爲長者順治丁酉鄉薦屢上公車不第授湖廣棗陽知縣數年以廉能報最行取授工部主事晉員外郎歷刑部郎中出

知徽州府卒於官初棗陽俗悍多盜不事本業公興學校
課農桑殲大憝禁淫慝由是民安其業而歌誦興後權稅
臨清寬厚以恤商旅讞獄尤稱仁恕及守徽徽俗健訟逞
逞傾家貲角勝莫之恤墨吏因爲利公廉以化之靜以安
之勸諭以熄之於是信順休洽訟獄衰息通判某嘗侮公
公置不校及大計上官問公曰判何如曰才曰聞其侮君
非浮躁乎曰計吏公典也某不敢藉公典以釋私憾況本
無介於懷乎上官斂容歎曰君眞長者也判遂全聞之匍
匐詣公謝罪泣徽三年愛民育士善政不可勝紀以試事

勞瘁致疾卒徽人無貴賤莫不縞素巷哭某通判流涕曰
公於我犯而不校德厚矣胡可忘哉爲之經紀其後事而
送其喪以歸子光諭附貢生康熙三十年遵例往湖廣安
集饑民數百家以知縣用未任卒光貽附貢生候選訓導
三舉鄉飲大賓孫堪任諸生正聲歲貢生

郃陽志

王可簡號喬居郃陽人好施濟嘗捐漢水田畝餘於社築
室其旁以飲行人有貧而鬻子者與之金使攜其子歸除
夕見門外一人將自縊急趨阻之問其故晉人也貸鄰木
棉十斤易金將完賦遺於道可簡謬答曰吾拾之矣遂如

數予之其人曰非吾金也曰汝金吾已用矣叩謝而去社人高其義子錫命康熙癸丑進士

邵陽志

惠鳳儀字來之澄城人少罹寇變

國朝兵西下挈入京道邁疾棄去太原張某見而異之撫爲己子順治初張爲戶部員外郎鳳儀亦錄爲其部筆帖式在部數載以敏練稱凡要會版奏以及方域磽隘羸絀之數靡不綜練

章皇帝親試稱旨授國史院編修遷內宏文院侍講內國史院侍講學士康熙元年從將軍圖公殲楚寇有功還拜

文華殿學士兼禮部侍郎充

世祖實錄副總裁遂以右副都御史巡撫山東爲政識大體以拊循爲亟約已利物詰奸佑良諸所舉核羣屬殿最悉當丁張艱去官吏民千餘人赴闕上書請畱鳳儀不可急歸未久卒鳳儀性慷慨好談當世畧吐納宏亮遇寮友侃侃指陳卽在

上前奏事時砰然大言以故在廷皆嚴憚幼罹變忘其縣名兼張終無子故卒不復本宗生子五次承哲爲澄城知縣至任後始悉其家世云

澄城新冊

馬穢土字相九號奚疑子父嗣煜以濟南通判殉崇禎十
六年三月之難者也穢土年十三徒跣出潼關迎其父柩
擗踊氣絕見者無不下泣葬後廬墓茹素三年不見齒鄉
里稱之曰父忠子孝古人所罕馬氏自文莊公以來世富
盛至是中落穢土孤苦無依惟與幼弟稚土影相弔而奮
志讀書以父爲馮少墟高弟家學不可墜也鑽研理窟刻
意躬行與黨湛王四服張珥王宏撰李因篤等相切劘者
四十餘年四方之志於正學者咸歸之康熙中蓋屋李中
孚倡反身改過之說與穢土宗旨合穢土與耆儒李士瓚

白煥采議敦請中孚至同會講於廣成觀中孚年甫四十
以穢土齒長不敢當弟子禮穢土白髮婆娑卒就北面時
人以爲難中孚所著反身錄學髓等書穢土皆序而刻之
中孚寄書曰大道無窮吾子能竟聖學忌雜吾子能醇維
持世風主張名教非吾子其誰與歸穢土以順治初補博
士弟子員食廩餼康熙三十二年貢成均四十八年卒年
八十道光二十六年入祀鄉賢祠所著有卷石齋語錄二
卷白樓存草六卷

六荔志

李天秀字子俊號蕉婁世居華陰東北隅之貞莊卽漢船

司空故址也其先諱奈者初官威州吏目封將仕郎子昂
官山西太原府司獄封登仕郎後無策名仕版者逮高祖
君選以儒術立鄉塾教族姓弟子曾祖一化祖所用襲其
業然僻處村曲僅能了五經四子書卽捨而農故皆終老
訓詁父功遜字順卿始應學使者試復以貧中棄居常快
快天秀生而端凝多慧五歲就外傳所肄輒通母蘇氏儒
家女也誠曰爾父以廢讀把憾久矣兒其勉於有成秀聞
之益奮學年十六隸邑庠生康熙四十九年庚子以第一
人舉於鄉主司爲茶陵大司馬彭維新宮詹洞庭王世琛

闡中擬爲老宿及謁見乃少年士共奇之蓋時方二十四
歲也雍正十一年癸丑成進士選庶吉士時司馬爲戶部
尙書畱寓其邸未幾司馬以事下刑部獄然朝夕出入第
中爲經紀家事如故知者歎其守義之堅焉乾隆元年改
授知縣任山東歷城歷城省會首邑事繁劇素號難勝理
之廼慨有餘也性高簡不能附上官於同寮亦鮮所徵逐
鹽賈俞某老無子晚置侍妾生二子而死其妻陶氏紹興
人女於時幕客之間處會城者利其厚貲羣推會稽陶一
鶚認氏爲姑唆令具控以二子非賈所生欲逐其母子爲

賈另嗣庭訊時天秀以大義曉諭陶氏氏頓悔悟備陳唆訟者爲某某悉拘之予以重杖未幾爲忌騰謗罷職羈畱歷下歷之學者與隣邑士子以詩文就正均爲解說別裁相繼登甲乙科者十餘人事白旋里圖書而外無長物焉事具歷城縣志息居田園課兒孫輩耕讀意泊如也以華邑舊志簡畧意欲重修遂博採羣書另爲纂輯今志卽其稿也乾隆十九年次子榛仕平陰知縣迎養至署則時時以官箴訓之二十三年父順卿公壽八十五歸而侍老父卒葬訖復至東阿署邁疫症失音二十九年妻魏氏卒榛

扶觀道途子楠等隨左右乘肩輿而歸越兩月亦卒年七十二葬於邑東之鳳凰原方其鄉舉而後自謂見聞未廣值司馬督學山左繼而秉臬中州先後往從之學及官庶常復寓司馬之第司馬蓄藏墳籍益得朝夕折衷遂致淹貫宏達人謂其學有本源也所著有來紫堂詩古文等集飭子孫守藏不得授梓子六人楠舉人借補安定訓導引病歸榛舉人以明通榜除知縣先任山東平陰調繁東阿再調歷城天秀舊治也士民見者喜相告曰此二十年前我公之仲子也咸呼爲小歷城云起復補江蘇溧水以失

察盜案去官餘列名邑庠孫或舉人神木縣教諭

王錫命字承天邵陽人由進士授江南蕭縣令涖任前二日宿郵亭夢有匍匐來告者曰吾蕭人也裴與醫通醫以藥鳩我死而人莫知乞雪此奇冤錫命下車卽據夢廉之得其實遂置醫於法時稱其神卒於官囊無一物合邑感其遺愛助以百金櫬乃歸

邵陽志

張大有字書登邵陽人生而孝友年十九以五經補邑諸生庚午舉於鄉甲戌成進士改庶吉士散館第一名授翰林編修庚辰分校禮闈稱得士纂修

三朝國史壬午丁父艱服闋補原官乙酉轉禮科給事中
丙戌充

殿試受卷官條奏科場積弊降國子助教以居官勤慎自
己丑至癸巳五年內歷遷奉天府丞丁母憂丙申服闋補
順天府丞戊戌遷都察院左僉都御史太常寺卿己亥授
大理寺卿辛丑遷都察院左副都御史壬寅授兵部左侍
郎署理漕運總督時運道淺澁公押運抵通實授漕運總
督雍正元年癸卯授兵部尙書職銜上漕政八條各船
次保甲俾旗丁水手悉就約束漕船遵定制估造哨船頭